



KEMENTERIAN PENGANGKUTAN

SIARAN MEDIA KEMENTERIAN PENGANGKUTAN PELUNCURAN PROGRAM GERAN PADANAN BAGI PENGGANTIAN KENDERAAN LAMA

PUTRAJAYA, 27 Januari 2026 – Kerajaan MADANI menerusi Kementerian Pengangkutan Malaysia (MOT) hari ini melancarkan Program Geran Padanan bagi Penggantian Kenderaan Lama, satu inisiatif strategik yang bertujuan menggalakkan pemilikan kenderaan yang lebih selamat, cekap dan mesra alam, di samping merangsang pertumbuhan industri automotif tempatan serta mengurangkan beban kos sara hidup rakyat.

Majlis peluncuran program ini telah disempurnakan oleh YB Loke Siew Fook, Menteri Pengangkutan dan turut dihadiri oleh pegawai kanan Kementerian serta barisan kepimpinan industri automotif negara.

Melalui Belanjawan 2026, Kerajaan telah memperuntukkan sebanyak RM10 juta bagi membantu kira-kira 5,000 pemilik kenderaan berusia lebih 20 tahun untuk menggantikan kenderaan lama mereka dengan kenderaan baharu yang lebih moden, selamat, cekap tenaga dan mesra alam.

Di bawah program ini, penerima yang layak akan menikmati geran padanan sehingga RM2,000, yang turut dipadankan oleh pengeluar kenderaan tempatan. Pendekatan ini bukan sahaja mengurangkan kos pembelian kenderaan baharu, malah memastikan bantuan Kerajaan memberi impak kewangan yang lebih bermakna dan mampan kepada rakyat.

MENGURANGKAN RISIKO KEMALANGAN & MELINDUNGI NYAWA

Program ini merupakan sebahagian daripada usaha berterusan Kerajaan untuk mengurangkan bilangan kenderaan lama yang tidak lagi selamat digunakan di jalan raya, sekali gus mengurangkan risiko kemalangan dan melindungi nyawa pengguna jalan raya.

Kenderaan lama lazimnya lebih terdedah kepada kegagalan mekanikal, kurang dilengkapi ciri keselamatan moden, serta tidak memenuhi piawaian keselamatan semasa. Oleh itu, penggantian kenderaan uzur melalui program ini dilihat sebagai satu intervensi keselamatan jalan raya yang signifikan dan berimpak tinggi.

Kerajaan menegaskan bahawa keselamatan jalan raya adalah isu nyawa, dan setiap kenderaan lama yang dikeluarkan daripada jalan raya melalui program ini adalah satu risiko yang berjaya dikurangkan demi kesejahteraan rakyat.





KEMENTERIAN PENGANGKUTAN

PELUPUSAN KENDERAAN MELALUI SISTEM E-DEREG JPJ & AATF

Pelaksanaan program ini turut diperkukuh melalui penggunaan Sistem Pembatalan Pendaftaran Kenderaan Secara Dalam Talian (e-DeREG) oleh Jabatan Pengangkutan Jalan (JPJ), yang membolehkan proses pembatalan pendaftaran dilakukan secara digital, pantas dan telus, tanpa keperluan hadir secara fizikal ke kaunter.

Kenderaan lama yang diserahkan di bawah program ini akan dilupuskan secara sah melalui Authorised Automotive Treatment Facility (AATF) — pusat pelupusan berlesen yang memastikan proses pelupusan dilakukan secara terkawal, profesional dan mematuhi piawaian alam sekitar.

Melalui mekanisme AATF, pelupusan kenderaan akan:

- Mengelakkan penyalahgunaan identiti dan nombor pendaftaran;
- Memastikan kenderaan lama tidak kembali ke jalan raya secara haram;
- Mengurus bahan buangan dan komponen kitar semula dengan selamat; dan
- Menyokong agenda kelestarian alam sekitar dan ekonomi kitaran.

Inisiatif ini juga menyumbang kepada pengurangan masalah kenderaan terbiar, peningkatan kebersihan persekitaran, serta pemeliharaan imej bandar dan komuniti.

MANFAAT KEPADA RAKYAT & INDUSTRI AUTOMOTIF TEMPATAN

Selain memberikan manfaat langsung kepada rakyat melalui penjimatan kos pembelian dan penyelenggaraan kenderaan, program ini turut:

- Menyokong pertumbuhan industri automotif tempatan;
- Merangsang permintaan domestik dan aktiviti ekonomi;
- Mewujudkan peluang pekerjaan dalam sektor automotif dan kitar semula; dan
- Menyumbang kepada pertumbuhan ekonomi negara yang lebih mampan dan inklusif.

Orang ramai yang layak digalakkan untuk merebut peluang ini bagi menikmati kenderaan yang lebih selamat, mengurangkan kos jangka panjang, serta bersama-sama menyumbang kepada **jalan raya yang lebih selamat dan persekitaran yang lebih bersih**.

Maklumat lanjut mengenai **syarat kelayakan dan mekanisme permohonan** akan diumumkan oleh Kementerian Pengangkutan Malaysia dari semasa ke semasa.

KEMENTERIAN PENGANGKUTAN MALAYSIA
27 JANUARI 2026

-TAMAT-





KEMENTERIAN PENGANGKUTAN

TENTANG MOT:

Kementerian Pengangkutan Malaysia bertekad untuk menjadi peneraju transformasi sistem pengangkutan yang bersepadu, efisien dan selamat dengan memperkasakan sistem pengangkutan berteraskan teknologi sebagai pemangkin pembangunan negara.

PERTANYAAN MEDIA

Kementerian Pengangkutan Malaysia
Unit Komunikasi Korporat

Tel +603 8892 1006 (Setiausaha Akhbar)

+603 8892 1027 (Unit Komunikasi Korporat)

Faks +603 8892 0208

E-mel sua@mot.gov.my / unitkomunikasikorporat@mot.gov.my

